

心月樓近作七首◎陳慶煌

德蕾莎頌

修女亦天使，每著白衣巾。

心常懷惻隱，救危又扶貧。

迭經二大戰，仁勇不顧身。

佈道兼辦學，惠及天下人。

榮膺和平獎，博愛見本真。

舉世尊慈母，其來誠有因。

一旦歸主去，寰宇為蹙顰。

精神信不死，懿德萬古珍。

題慈恩寺塔

聞說慈恩塔，登臨喜及春。

諸天多雨露，萬象絕風塵。

地是中州勝，人真上界鄰。

祥雲呈五色，貝葉度迷津。

曝書

名山我欲珍千卷，常曬庭前日未晡。

逐葉親翻除蛀跡，移來四部亦工夫。

曬書有感

為恐名山留蠹跡，琳琅曝至夕陽收。

何如腹笥便便在，自有文光射斗牛。

查榜

堪笑心情似守株，未知蕊榜列名無？

為樑為棟看今日，料必朱衣眼有珠。

謁延平郡王祠

艱難獨立欲回天，一片丹心日月懸。

義膽焚衿圖抗滿，洪荒闢此漢山川。

遊西子灣

西子風光愜素襟，凌空千里遠相尋。

奚囊滿貯增吟興，雪爪泥痕印淺深。

2010/09/27